

Nova lescha da scola e novas structuradas

Dieta annuala dalla Magistraglia grischuna ad Aschera

■ (mc) **Mesemna èn bun 500 magistras e magisters dal Grischun sa radunads ad Aschera per lur dieta annuala. Per ils participants èsi stà in di da perfecziun intensiva che è vegnì arrundà da la radunanza da delegads da la Magistraglia grischuna.** La dieta da la Magistraglia grischuna è usitadamain deditgada ultra da las tractandas statutaricas ed a la fatschentas politicas a la scolaziun e perfecziun da las participantas e dals participants. L'avantmezdi èn las differents secziuns dals singuls stgalims da la Magistraglia grischuna sa deditgadas a la perfecziun. Las mussadras da scolina e las pedagogas curativas èn s'occupadas da

l'integraziun d'uffants cun basegns spezialis en l'instrucziun. La fracziun da la magistraglia primara ha tematisà «Il magister sco coach d'emprender» cun il referent *Alois Keller* da la Scola auta da pedagogia da S. Gagl. Tar ils magisters dal stgalim superiur ha l'intermediader da professiun *Reinhard Schmid* referì davart l'instrucziun d'elecziun da la professiun sin il stgalim secundar I.

Integraziun da scolars cun impediments

Il referat principal avant il plenum da la magistraglia ha tegnì *Niel Jent*. Il scienzià e perscrutader enconuschent entras ses

film «Unter Wasser atmen – Das zweite Leben der dr. Niel Jent» da l'Institut per direcziun da personal da l'Universitad da S. Gagl ha documentà cun ses referat impressiunant tge ch'i dovra per il success d'ina integraziun da scolaras e scolars cun impediments.

Nova lescha da scola – ina schanza per la scola grischuna

Il parsura da la Magistraglia grischuna *Fabio Cantoni* considerescha la dieta da quest onn sco ina dieta d'in nov cumenzament. Cun las novas structuradas è la Magistraglia grischuna daventada pli cumpacta per sa preparar per l'avegnir.

La nova lescha da scola considerescha Cantoni sco in term impurtant ed ina schanza per la scola grischuna e per la societad. El giavischass dentant ch'il chantun surpigliass ina rolla pli activa e directiva tar la transformaziun da la lescha en la pratica.

Nova gulivaziun da finanzas – dapli grevezas per las vischnancas

In ulteriur tema ch'enserra ina tscherta brisanza è la nova gulivaziun da finanzas en preparaziun. Malgrà che il chantun haja realisà differents meglieraments sin fundament dals resuns da la procedura da consultaziun vegnia la

scola adina dapli sut squitsch. Per il directori da la Magistraglia grischuna è la reducziun previda da las contribuziuns chantunalas pauschalas per scola in schlet signal per in pensum che duai vianavà vegnir schlià cuminaivlamain da chantun e vischnancas. Novas incumbensas che la societad surdat a la scola effectueschan tenor Fabio Cantoni custs supplementars, ina part da quels stoppia il chantun surpigliar. Mo uschia possian ins sustegnair commenturadamain ils purtaders da la scola. Ulteriurs temas sin l'agenda politica èn il plan d'instrucziun 21 e l'iniziativa da linguas.